

育德堂外制

育德堂外制卷第二

王居安兼侍講

禮所以辨上下定是非別嫌明微移風易俗其  
繫於天下國家至重也朕方作新治道一正權  
綱故樂與賢士大夫切磋究之爾剛毅之資高  
明之識勇退難進厥聲霽然登之諫垣咨以經  
誼卿其為朕明禮之原思所以止邪於未形者  
朕虛已以聽舉而措之益據乃忠以稱朕志

夏震觀察使

朕念邊事之未寧歎將材之難得眷言裨佐夙  
衛周廬嘉乃賢勞錫之茂渥具官某赤心許國  
偉略過人名譽聞於朝廷恩信孚於士卒回翔  
滋久氣概凜然屬時中權往臨外聞方暫資於  
攝事已備見於宣勤察其忠忱良可倚仗朕惟  
熊羆之士保乂王家思見其人喜於得汝爰陟  
康輿之峻以增環列之華尚體隆知勉圖來効

項安世降奉議郎

朕茂建大中隱惡揚善凡有勞于國者不以人

言而輕廢也爾往以材選經營上流而宣威之  
臣與中執法厯陳爾過朕疑於用舍之際蓋久  
而後決焉爾休于家而言者不置且謂爾縱下  
為虐豈朕所望於儒者哉尚體隆寬毋忘自省

趙善恭司農卿

重內輕外自昔患之 中興以來始以卿若郎  
出司餽餉蓋雖在外而視內為重焉至于近歲  
或就陟從班則其任又加重矣爾公姓之英奮  
于科目晚筮班列不耀其華再領帥垣材猷始

見阜通民食鎮撫上流朕固不輕於選任也甫  
及數月規畫粲然農扈之聯由貳而長去從班  
一閒耳勉圖績用以俟寵光

趙夢極權吏部侍郎

朕更化云初得人為重旁求俊彥丕昭啓迪之  
規勩相國家式謹灼知之要肆登衆望以冠貳  
卿具官某休休有容謙謙自牧允矣中行之吉  
澹然難進之風載筆丹墀回翔最久執經朱郎  
裨益居多朕方一正紀綱聿新政理察卿篤厚

稱我選掄爰擢任於銓曹且兼司於瑣闥屬正  
元良之位更資羽翼之忠樂只一賢錫之三命  
卿其盡獻納論思之實以輔朕躬明孝仁禮義  
之方以淑吾子克殫忱報永保令名

梁季琬試吏部侍郎

朕大開公道力杜倖門辨流品以任官風分四  
選念吏胥之舞法孰甚三班肆擇通材誕敷成  
命具官某稟資寬厚蘊識融明奕世風流久隆  
物望平生抱負備見民庸晚入踐於周行適擢

司於大計屬嚴邊警方急兵儲獨懷百姓之困窮不徇一時之督責孚於朝論簡在朕心乃正位於貳卿俾升華於小宰付之銓綜期以論思典常作之師諒咸推於平允謀猷告爾后尚勉効於忠忱往體眷知勿忘報稱

戴溪國子祭酒

昔三代之學自王世子及國之俊選咸造焉蓋其教始於宮庭而達於四海王道之盛朕其慕之雖古今殊時沿革異制欲存此意必待其人

爾學極淵源行全精白貫多聞於至約勤小物  
以無遺講道成均範模一正執經資善開導有  
方肆時序遷寶階大用爾其內輔吾子殫進善  
託過之忠外迪諸生究成德達材之效雖古大  
司成之任何以過之勉述前修以符妙簡

雷孝友御史中丞

朕嘉賴蓋臣作新治道防微杜漸謹操威福之  
權明法直繩倚重紀綱之地肆精選任以肅觀  
瞻具官某識照幾微志全剛毅黃鍾獨奏密回



一氣之和砥柱中流力障百川之勢伊忠謀之  
協濟俾姦慝之不容望著縉紳勲存宋社爰晉  
司於封駁每明辨於是非屬獨坐之虛員酌僉  
言而申命升之勸誦侍我燕閒其糾遯於官邪  
以維持於國論式迓和平之福益倍長久之基  
進有德朝廷尊孰不想聞於風采難任人變夷  
服庶幾遠暢於威靈尚悉乃心以成朕志

葉時試右諫議大夫

御史三院之聯所以執憲奉法爭臣七人之選

所以陳善責難惟親任之有加匪端良而孰畀  
具官某清姿照物美德潤身自擢贊於臺綱每  
力扶於國論有懷必吐拳拳辰告之忠獨立不  
隨凜凜歲寒之操始終一致中外具孚朕方斥  
遠朋邪招徠衆正乃眷簡知之素載觀風采之  
新惟朝廷之輕重在用人惟生靈之戚休在出  
令卿其無隱朕所樂聞小往大來適陽剛之浸  
長諫行言聽庶膏澤之下流勉及昌期茂據宏  
綱

趙彥逾侍讀

朕總攬權綱講求政理達聰明目罪已正於四  
凶養老乞言禮首隆於九族眷時耆哲越在宗  
盟喜其遙歸資以自近具官某望先百辟德著  
累朝夙高翼戴之勲未究經綸之業尹茲西  
土仁愛孚於民夷保彼東方信義行乎州里有  
嘉操守欽企典刑伊袞繡之重來想薦紳之胥  
徯威儀恂慄欣復見於清標議論正平獨深明  
於大體逸之珍館侍我金華以重朝廷以崇屏

翰噫 元祐作新之始亟起韓維 紹興更化  
之餘延登張燾歷考 皇家之盛選孰如同姓  
之元臣益磬嘉猷永扶令緒

王居安起居郎崇政殿說書

朕惟 祖宗成憲諫史之官皆日奉內朝號為  
親近職守雖異禮貌實同今得其人迭居是選  
爾氣全剛大行迪中和抱愛君憂國之誠有好  
善疾邪之志甫登言責風采炳然乃惟史官適  
茲虛左顧親賢之無間雖易地以何嫌矧入侍

螭頭出聯豹尾有所論奏許以直前而又密奉清間講論經理古今治忽皆得指陳豈必諫官而後可盡言也勉輸忠盡以贊緝熙

邵康太常少卿

儒者之道厯萬世而無弊者其惟禮乎昔我祖宗隆儒重禮基本深原教化流行朕承而守之惟恐或廢思得雅望以任其官爾學貫古今識兼博約名實之茂諸儒所推蓋嘗羽儀近班駸駸大用而承流于外非所以煩爾也肆茲召

見俾貳容臺朕方一正綱常載嚴秩叙凡先王  
制作之意列聖脩明之方資爾討論以俾治  
道茂摠所蘊朕將有觀焉

錢仲彪軍器監

士之謹守廉隅能世其美者朕所嘉與也爾風  
度蘊藉似其前人治郡有聲立朝無玷樞庭列  
屬士論謂宜顧以引嫌於焉改命惟戎器之繕  
自有司存從容其間姑以養望異時禁從之選  
蓋由是而階升焉益懋家傳以需簡拔

俞亨宗提點坑冶

泉貨之司兼幹數路察舉之職雖視他使者少  
異而事任為重矣非得其人胡可輕畀爾儒雅  
操尚聞于播紳剖符南州政平訟理而杜門再  
歲泊然無營朕方振拔滯淹惟材是用起家之  
寵可獨後於汝乎往踐厥官興廢補弊遙觀績  
効嗣有褒陞

樓鑰翰林學士

周尊尚父天下喜其來歸漢召申公君子惜其

不用朕作新庶政翕受群材允懷簪筆之英可  
遂垂車之適起之東土處以北門具官某勞在  
三朝望隆一代博聞強識蔚然華國之文特  
立獨行卓爾過人之操恬退已成於高致經綸  
尚鬱於素懷屬當更化之初彌切貪賢之念載  
惟作命孰重代言將使老瘝扶杖而往觀樂聞  
德意武夫揮涕而感激願赴功名資卿體要之  
辭達我精微之蘊以崇國體以協人心皇極建  
而邦其昌伊敷言之有屬播告修而民丕變豈



圖任之敢忘尚及斯時盡行所學

林大中吏部尚書

朕博求耆德協濟宏規念累朝長育之餘號為多士考十載論思之舊能復幾人雖高止足之風敢後招延之禮具官某質涵粹美學造醇深陳善閉邪讜論聞于海宇砥節厲行清名重于搢紳豈惟寵辱之不移抑亦行藏之無愧遺榮滋久養望彌崇朕惟二老來歸周道始盛四皓不仕漢烈以卑爰採公言亟頒溫詔旌以蒲

輪之寵冠于荷橐之班道路有光朝廷增重斷  
斷無他技朕方欽企於猷詢藹藹多吉人卿尚  
咸思於勩相期予于治惟乃之休

趙善堅權戶部尚書

制國用之入出周實命於宰臣酌財物之盈虛  
唐浸分於使領惟元豐之定制任民部以責成  
匪得其人孰辨茲事具官某器空槃錯智燭隱  
微三入承明久賴論思之益再為京兆獨推彈  
壓之方雖在浩穰居然整暇比晉躋於常伯尚

因任於事官嘉乃通材付之大計朕躬行儉約  
深虞邦賦之未贏專務拊摩每歎民生之易匱  
矧方調發尤迫轉輸自非深究於源流何以力  
培於根本資卿長筭為我審思推節用愛人之  
心達諸號令廣輕徭薄賦之惠施及黎元誕保  
丕基以垂令聞

陳希點軍器監

朕博選賢能詳試中外其名實相稱物望所歸  
者固宜不待次而舉也爾經明行修安恬不競

詳刑閩嶠仁譽流聞及茲召還列之舊綴朕慄然有不足焉詩不云乎藹藹王多吉士維君子使朕方圖所以處爾者其敢忘哉

陳希點檢正曾從龍左司

朕既委任疑丞作新治道又選一時良士以為之屬使相與從容裨贊庶幾萬務無壅百工以熙爾希點詳練之材養德彌粹爾從龍久大之器抗志不群士論既孚民庸亦著顧兵戎之事寧足以屈爾乎往佐大臣少攄素蘊益堅爾守

以副朕知

陳舜申林至正字

朕樂得群材處之冊府曾不數月而給札于玉  
堂者三焉朕固不敢一日忘天下士也爾舜申  
老成之彥氣志不衰爾至沉厚之資詞華日進  
列于璧水多士宜之養望清塗自今以始懋充  
器業以稱選掄

劉彌正淮東提舉

部使者朕所重也淮鹽之利國計是資視他路

為加重邊警之餘姦弊易啟視他時又加重矣  
顧可以輕付乎爾清白傳家忠忱許國介然之  
守出于輩流朕察爾所存期以顯用姑畀使節  
以觀外庸推爾之材其效可日月計也朝方急  
士朕豈汝遺

李師尹知閤門事

衛小國也王孫賈治軍旅仲叔圉治賓客聖人  
有取焉朕今以一臣更任二事由外而內用究  
其材具官某生于將家早膺器使踐揚浸久陳

力為多日者堅守一城獨捍強敵課其功伐於  
今諸將不多見也寵以來歸復置邇列典我上  
閤惟爾宜之夫軍國雖異容文武非殊致爾能  
處是二任而各適其宜則庶幾矣往祇官守以  
報隆知

李珣知紹興府

浙河之東越為都會今地望之重視漢馮翊扶  
風矣而公私未裕朕甚患之比者就選監司以  
任連帥蓋習知其利病休戚則其政易達其民

易乎也爾疏通之質幹敏之材服在周行蔚有  
休聞宣化夙勞於撫字詳刑式謹於平反爰升  
禹閭之華超昇輔藩之寄爾其講求實政宣布  
寬恩緩征歛以安民情節用度以紓郡計佇觀  
最課亟下褒書

張震考功郎中

朕更化之始寤寐求材凡有別于朝而流落不  
偶者必審其望實進而用之爾謹厚飭躬儒雅  
節吏周旋中外士論所推去國十年不求苟進



肆加收召置之郎闈夫用人聽言治道之要爾  
既為朕陳之矣養其所可用盡其所當言朕方  
以望爾焉勉哉毋怠

黃景說再任張斗南廣西運判

朕念二廣遠於王畿元元戚休惟使者是覩非  
中朝之彥朕所素知者孰與任其責乎爾景說  
寬厚之資臨民不擾爾斗南剛介之操修已有  
常簡在班行習聞德意疇庸而因任或選表  
而褒陞雖地有東西時有久近光華所被則無

間然其勉布於寬恩以仰符於隆委

楊大雅封承奉郎

壽考安榮人子之所願於其親也朕載脩宗  
祀推老老之恩而爾年過九齡逮于祿養進之  
京秩服我寵光

丘密江淮制置大使

朕厯考中興之烈有嚴制閭之權或優異大  
名任靡兼於他路或盡付方面地不領於留都  
眷言宥密之賢復寄保釐之重乃參前矩誕布

明綸具官某一代偉人 三朝宿望延登近弼  
親帥元戎為憲萬邦材允侔於吉甫決勝千里  
智豈下於子房獨懷體國之忠首建弭兵之利  
行藏雖異中外具瞻朕正權臣蒙蔽之刑嘉元  
老久長之慮俾通班於書殿亟申命於麟符瞻  
彼江淮號為表裏列城綦布當如臂指之相承  
諸將雲屯欲令首尾之相應非專統御曷究事  
功載加使領之新期展規模之素惟敵情之未  
測抑民志之易搖方賴威名迄臻綏靖賦鴻雁

之安宅歌秋杜以勤歸噫伯益之與徂征陳班  
師振旅之義充國之圖方略進保勝安邊之謀  
卿惟無愧於古人朕亦有辭于永世

游仲鴻夔路提刑范子長潼川提刑  
朕博求蜀之秀士寘諸周行又使歸試民庸達  
朕德意於庶獄之任尤重其選爾仲鴻爾子長  
皆以操履醞藉有譽于朝或已駕使輶于焉申  
命或方紆郡組寵以超除爾其體欽恤之仁篤  
哀矜之念使萬里之外舉無冤民方圖爾勞嗣

有涯

楊震仲直閣致仕

守節伏羲之臣國家所賴以長久也逆曦之變  
士大夫或靡而從之至于舍生取義視死如歸  
者四蜀之廣獨爾一人而已然而曦之被誅曾  
不旋踵豈非忠節之著衆所聳聞固有以興起  
人心扶持名教乎崇階華職責于九原英魄凜  
然庶其來監

吳獵四川制置使

朕緬懷四蜀邈在一方假宣威之權固特嚴於  
屏翰隆制閫之任尤允賴於保釐乃輟近臣以  
綏遠俗具官某精忠許國偉略過人全付上流  
思信孚於襄漢坐却強敵聲名震于關河擢與  
論思彌深眷倚適北陞之少定顧西土之多虞  
更藉仁賢徃敷德意已下遄歸之詔樂聞入告  
之猷念行臺專總於邊防正資協濟而屬部久  
勞於兵事宜務綏懷伊職守之相須欲施為之  
不悖孰堪此選無以踰卿登之雜學士之聯畀

以六十城之寄底殫遠慮茂闡宏圖以大慰於  
人心以永紓於民力惟張詠之直節獨推安集  
之勲惟趙抃之清規克布中和之政勉踰前哲  
以契朕心

畢再遇授觀察使

朕脩明師律遴選將材疇其雋功畀以重任至  
于閱時滋久聲望日孚則又獎而進之超于常  
序具官某鷹揚之志輻湊之謀奮自偏裨効其  
忠赤堅守六合獨張吾軍江面帖然國威以振

一時宿將未有能先之也不矜其勞益祗乃事  
恩意決于萬旅號令孚于列城陟之廉車公論  
惟允昔李牧為趙將匈奴不敢近邊伊爾之材  
可任斯責勉圖成績以企古人

曾漸權工部侍郎

萃英髦于三館久資領袖之良分職守于六卿  
允藉羽儀之重有嘉偉德式契隆知具官某識  
造精微學原正大晁董公孫之對早擅修名莊  
騷太史之文固其餘事比由東觀晉攝西垣審



觀消長之機力致忠邪之辨惟今多士如爾幾  
人顧以引嫌于時改命輟我代言之選登諸宅  
事之官伊公道之日開適善人之類進庶殫遠  
慮共贊丕圖宮室苑囿之不增方躬行於儉約  
期會簿書之至簡獨深賴於論思尚采乃言永  
臻于治

許奕起居郎

朕初嗣服親策多士于廷一時英材率在前列  
得人之盛朕甚嘉之曾未十年已收其用爾見

聞博洽論書閨明秀出岷峨遂冠天下紬書東  
觀涵負益深載筆右螭安詳不競朕又嘉爾德  
之日進也闕時浸久肆命序遷朕方審更化之  
宜思弭兵之利豈無他士舉以屬卿尚殫厥忠  
以須大用

陳希點起居舍人

朕一新綱紀臻庶政之和肇建元良繫四海之  
望敷求重德之士游吾父子之間爾識度精深  
行義修潔粹若白圭之無玷巍然喬木之後彫

三八修門獨推宿望彌綸省闈班列浸高諸大  
夫國人猶以為未稱其德也記言右陛勸講東  
宮非爾孰宜之安危治忽之原邪正是非之辨  
惟爾靜閱固所深知進以沃於朕心退以淑於  
吾子爾之任也尚其懋哉

孫紹先浙東提刑李洪江西提刑

浙河之東大江之右其士大夫疊疊然從事於  
文矣而其民趨利喜訟習俗未遷詳刑之司其  
責為重爾昭先豈弟之美奏最近藩召寘郎闈

藹然譽聞爾洪疏通之器夙著民庸簡在列卿  
復勞于外兩路之寄分以畀之嚴毋過於苛寬  
毋流於弛達朕德意使民鄉方則予汝嘉適有  
褒擢

呂祖儉贈直秘閣

自昔忠節之臣盡言無諱其愛君憂國發於至  
誠一身存亡蓋不暇計微斯人也綱常孰與立  
哉爾國之世臣克濟其美在朕初載擢賓周行  
屬時姦凶浸竊威福察微慮漸抗疏指陳可謂

獨立而不回者矣朕虛已受人樂聞讜論而群  
邪蒙蔽使爾流落以死朕有愧焉更化之初亟  
加褒贈凜然勁節千古有光昭示後來尚知興  
起

沈既試刑部侍郎

舜命有德選必首於士師周用常人戒獨嚴於  
司寇咨時宿望寄以祥刑具官某剛毅近仁溫  
良能斷趨事赴功之志早著賢勞難進易退之  
風晚推特操比儀通列務在登賢欣聞造膝之

言灼見沃心之義厯指一時之極弊欲明天下  
之至公講貫已精條陳有序朕方期群生之遠  
罪虞庶獄之失中資爾哀矜助予欽恤廣好生  
之德俾不犯於有司推式敬之誠庶以長于王  
國徃祇休命益罄深衷

趙夢極給事中

出納王命地莫要於夕郎輔導儲闈職孰親於  
端尹合茲隆委命我耆儒具官某識遠而明氣  
和以勁告爾后于內獨素効於忠嘉從吾兒而

游每深明於仁孝眷懷所屬譽望交歸乃登選  
部之崇仍寄銀臺之重朕惟喉衿之會授任宜  
專羽翼之功責成尤切儻尚勞於銓綜殆未稱  
於倚毗曾不淹時為之申命惟兢業所以凝庶  
績惟元良所以正萬邦豈徒允賴於論思抑亦  
卒煩於調護李藩批敕式高清算之風孔霸授  
經尚想謙冲之美其摠素學以掩前聞

曹莊太常丞邵朴國子監丞

禮樂出於容臺教化原於胄序朕既登海內之

望以典領之又擇英游俾贊其事爾莊溫良之  
德學業脩明爾朴剛直之資見聞博洽朝朝既  
久厥聲藹然分命為丞並列清望爾其推禮樂  
之用審教化之方各脩厥官以稱朕移風易俗  
之意

趙彥橢戶部郎中

懷德維寧宗子惟城周家之所以長久也朕一  
新治道既延登宗老訪以經誼又擇其行謹厚  
者進而用之爾砥礪廉隅被服儒素回翔于外



美聞曰章召對便朝有言可采列之郎省人無  
異辭古所謂惟城之賢於爾見之矣益舒遠業  
以對殊知

潘洵太學博士

朕既正權綱大開言路凡士之納忠陳善者皆  
所欲聞也爾入對昕庭從容論奏察微慮遠條  
列甚明可謂能盡其言者矣橫經璧水選畀不  
輕益懋爾猷毋忘樂告

范之柔國子監簿

祖宗盛時公卿之世能守其家法以顯于今者  
不多見焉苟有其人朕所樂與爾先正之裔奮  
于儒科文雅自將風流未泯簿正之選胄序為  
清振爾家聲朕將有考

許沆太常博士

儒者不言兵世以為病然自昔建功立事亦鮮  
不出於儒者焉蓋惟深知書者能知兵也爾西  
州之秀學博識周佐我元戎邊防有序肆由壁  
水進之容臺內踐清華外參籌畫孰謂俎豆軍

旅而不相為用乎式迺其歸以究爾業

余崇龜檢詳

士之不汲汲於求進者必能盡心於職業者也  
朕之用人常以是取之爾性行和平將以儒雅  
剖符名郡豈第宜民久次郎曹安恬自守朕方  
並進人望以任樞機乃疇爾材俾之裨贊尚堅  
素履式俟褒遷

梁文恭軍器監簿

朕患習俗之嗜進故於老成淳靜之士竊有取

焉爾博學多文不以自眩隱然譽處重于周行  
簿正之聯姑云序進益堅爾守嗣有褒陞

薛極大理正

古者獄辭之成正先聽之而後以告于大司寇  
則理官有正其來尚矣爾明習法令用以決科  
當准是官蔽罪惟允分符近郡民譽日聞肆疇  
爾能還之舊著爾其思古設官之義體朕恤刑  
之心毋怠于初以需明陟

林淳厚授散郎

朝

自有事于邊凡吏之能效其力者無不賞也爾  
倅于房陵實攝守事而能恤民厲士思患預防  
千里之人恃以無恐爾一秩尚益勉之

葉適授朝議大夫

朕簡拔儒英登之法從待遇之意超越庶僚而  
考績之常不敢略也具官某慮周物表識照幾  
先脩名播于一時偉業該于千載入儀邇列據  
獻替之忠出撫留都著蕃宣之効方疇庸而趣  
召顧引疾以祈閑會課當遷秩以元士尚資猷

告母有遐心

常楮宗正丞

士之進于朝者至三丞為高選矣非可用之材  
見於已試孰使稱其任乎爾夙抱器能通知世  
務雖承流二郡贊畫元戎而未究其用也晉丞  
外府復佐邊籌登之司宗俾將使指凡兩淮之  
利害其周訪而審察之歌四牡之詩朕方有待  
彭州威祐廟加封

朕惟神之垂祐于民其感靈響應必有相與左

右先後者焉惟爾七神同德協順以惠千里歷  
年滋多邇者叛蠻擾逆邊臣奸命賴神之力郡  
以底寧朕用嘉之並衍美號尚時顧享益宏爾  
休

武舜忠授遙團

將帥之士有功于邊比其巧歸可忘疏寵具官  
某分總王旅兼領郡符忠勇素聞恩信滋洽身  
先士伍力挫敵鋒宣勞既多以疾來諭超其命  
秩昇以我團祗服茂恩尚綏遐祉

莫子純敘中大夫

朕愛惜人材待之以恕凡麗于罰者未有不次第甄敘也爾蚤以文藝冠于諸儒簡在清華遂登顯用胡為不謹以致人言引咎杜門亦既累歲爰因霈澤盡復前官尚屬操修不汝遐棄

馮拱贈武經大夫

自邊事以來朕於將帥之臣未嘗不錄其勞而厚其終也爾久蒞戎伍材用著聞統我舟師亦既踰歲敵之不窺江面爾與有力焉矜其云亡



超贈崇秩九原未泯服此哀榮

藍師古授左武大夫

朕篤兄弟之愛設講授之官比其終篇不忘第  
賞凡與於執事者亦次及焉具官某列職內庭  
書勞宮邸遷秩之寵厥有故常惟予介弟方專  
志于學有日益之功爾之受賞豈一階而止哉

鄭擢降奉議郎

汝比以能選往涖邊城昧於事幾輕去官守削  
秩二等歸省于家尚服寬恩勉思後効

扈卞追復奏議郎

爾在審官自底于罪而能奔走王事不愛其死  
還汝舊秩追責九原非苟為恩亦以示勸

潘師高授承宣使

朕選虎賁之士以衛周廬掌之信臣有嚴職守  
三歲校比可無寵褒爾戚晚奮身克自謹飭訓  
齊什伍咸精其能留務之崇畀以遙領服我休  
命益脩厥官

譚良顯敘朝奉大夫

朕審功過之實明賞罰之宜不以過廢功而務以功掩過爾比坐微累曾未幾時而吾宣威之臣第襄陽城守之績爾實與焉亟復前階俾留莫府朕之施於爾者厚矣惟毋貳爾過益圖厥功則予汝嘉嗣有褒擢

王處久降武翼郎

自遣戍北鄙以來朕念六師暴露于外歲時犒予每加厚焉至於謹飭攸司毋使差忒則將臣之責也具官某司我步旅克著忠勞豈其尚寬

未免失察貶秩一等以肅官常爾其推實惠於  
卒徒杜蔽欺於胥吏俾恩信孚洽號令精明于  
以圖功庶幾補過典聽朕訓徃惟欽哉

自重授率府副率

朕惟英宗光紹大統蕃衍之祉燕及無疆乃  
眷宗藩載茂渥爾生長宮邸謹厚自持列之  
近班日奉朝請為善之樂尚其懋哉

朱士挺降奏議郎

自遣戍于邊供億浸廣吏緣為弊不可以弗防

也爾簡在周行實司兵廩顧茲失察俾錫一階  
往體朕懷勉脩乃職

曾噩降修職郎

邦用之出必有審覈之司所以防吏欺也爾攝  
事其間顧茲失察秩<sup>錫</sup>一等以警將來

陳唐卿授武翼郎

爾給事宮闈歲月浸久有嘉陳力秩諸銓曹往  
服寵光益思報効

育德堂外制卷第二

育德堂外制卷第三

衛涇參知政事

朕夙懷寅畏永念艱難任賢去邪已聳一時之  
觀聽立經陳紀將隆千載之基圖深惟機務之  
繁式藉弼諧之重得諸已試命以序遷具官某  
學造深醇德涵渾厚處進退卷舒之際不易其  
方宙往來消長之幾善藏其用比發揮放忠蘊  
遂昂絕於元凶正色憲臺朋姦破膽運籌樞筦  
強敵寢謀方推定國之規期底息民之福延登

丞轄增重朝廷朕惟治忽之端安危所繫權綱  
既正有防微杜漸之思膏澤未孚有履薄臨深  
之懼匪資識慮曷究彌綸惟至公可以杜覬覦  
惟實惠可以蘇疲瘵庶輔成於治道以保固於  
人心噫股肱良而庶事康允賴協恭之美陰陽  
和而萬民殖聿臻善治之祥勉悉乃誠對揚朕  
命

雷孝友參知政事

舜舉元凱有稷契臯陶之並稱周任賢能有方



召山甫之齊美念欲熙於庶績必允賴於衆賢  
爰采公言游揚明命具官某賦資挺特制行剛  
方博古通今學每期於有用守文應變材不見  
其或偏自躋禁從之聯獨有用家之慮姦朋旣  
斥正路宏開伊灼見於忠忱宜亟登於弼亮擢  
由獨坐資以同寅朕方審酌化原勵精治道興  
滯補弊期百度之脩明保大定功俾群生之休  
息雖成規之不紊顧實政之未敷其協贊於經  
綸庶廣宣於惠澤式臻嘉靖永保丕平噫無怠

無荒所以代天工於不息惟和惟一所以成君德於日新勉罄大猷以收偉績

史彌遠同知樞密院

朕倚賴英材收還大柄放佞邪之黨勲已著於宗祧成道德之威任宜參於帷幄誕敷明命式慰群瞻具官某天稟忠純家傳問學廸予元子夙殫羽翼之勞為國世臣克受腹心之寄肆密毗於威斷遂一正於紀綱天地清明人神悅懌永惟先正光輔 阜陵偉成績之不忘喜象

賢之有在豈特父子一門之盛事實為君臣千  
載之休期方晉陟於文昌亟延登於宥密惟儲  
闡列屬莫如賓客之崇而累聖垂規率用疑  
丞之重示眷懷之特異加寵數以兼隆允藉圖  
回抑資調護噫伊陟之繼伊尹存警戒于商書  
召虎之似召公紀功名于周雅益摠素業追企  
古人

林大中僉書樞密院

朕寅紹丕基惕懷遠慮外小人內君子聿開交

泰之祥泣中國撫四夷思致安強之効乃登耆  
艾以翊樞機具官某一代純儒累朝重望德  
如衛武不忘磨琢之功清若伯夷可激懦貪之  
俗比作新於政治獨注想於典刑起自垂車首  
于持橐遄采縉紳之論俾參帷幄之籌伊烽燧  
之尚嚴矧瘡痍之未復載誨民瘼有惻予衷利  
在弭兵顧敵情之難保謀先固圉恐衆志之易  
偷自非益謹於內脩何以潛消於外侮方資精  
識共濟良圖以期閭里之安以底干戈之戢噫

任舊人而共政已丕變於群心倚元老之壯猶  
庶終敷於文德其摠爾學以契朕知

樓鑰試吏部尚書兼翰林學士

天官之首六卿式裨邦治學士之為內相實代  
王言載稽累聖之成規間以一賢而兼領惟  
特承於異眷思疊被於真除匪得純儒曷追盛  
軌具官某存心正大育德中和究安危治忽之  
原有志當世審用捨行藏之義無愧古人凜勁  
操以不渝遏狂瀾而獨立朕方斥遠朋比收用

老成亟命安車趣還法從豈特發揮於翰墨固  
將咨訪於謀謨肆疇已試之能並畀久虛之任  
復資博雅以輔緝熙立太平之基方侈得賢之  
慶開衆正之路尚推引類之忠克贊丕圖邁登  
大用

倪思權兵部尚書

朕廣延衆正共濟多虞禁暴戢兵任實關於武  
部尊德樂道禮尤重於經筵登我舊人錫之新  
渥具官某懿文華國偉業濟時聲名早出於諸

儒選拔已逾於二紀仕已之無喜愠孰企清規  
用舍之為重輕咸推宿望屬茲恤之得志耻緘  
默以容身力罄謹言獨全壯節比大明於黜陟  
方並用於忠良式佇來歸有嘉猷告乃進六官  
之長載陪五學之游惟誕敷文德之方猶資遠  
慮惟緝熙光明之益更賴博聞其體朕知勉摠  
爾蘊

章良能試禮部侍郎

備車馬備器械寄以重於五兵和上下治神人

任尤隆於三禮孰膺是選宜屬詞臣具官某識  
慮閎深見聞博洽疏通知遠之學獨探遺經溫  
厚爾雅之文力追古作踐揚彌久望實交孚及  
再遙於班行乃亟躋於侍從適當更化實與代  
言寓朕腹心孚于號令爰正儀曹之貳以增翰  
苑之華密侍經帷載參史筆並畀一時之清望  
允為儒者之至榮任賢使能方勉圖於治効拾  
遺補過尚深賴於忠規祇服寵光益摠器業

史彌堅權兵部侍郎



寄彈壓之權位已崇於九列登論思之選任式  
重於六官嘉乃忠勤副于簡拔具官某稟資磊  
落蘊智精明父子傳家踵風流而克肖弟兄許  
國顯聞望以交輝比將指於日畿遂承流於天  
府洊經煩使具見賢勞材恢恢而有餘事多多  
而益辦朕惟司馬之職立武所關適茲多故之  
餘正藉十全之慮載橐弓矢方共冀於息民克  
詰戎兵當益嚴於固圉往攄長策以報殊知

衛涇封贈三代及妻

故曾祖贈朝請郎孝先可特贈太子

少保

朕惟周之大夫廟祀三世蓋推其福祚之所由  
始以慰追遠之思矧吾大臣豈忘報本具官某  
故曾祖某美德懿行推重鄉閭厲志詩書獨安  
隱約發祥有子奮于儒科爰及曾孫遂登近輔  
即其收功之遠豈不足以見積慶之深乎考諸  
舊章追錫宮保服予茂渥發爾幽光

故曾祖母宜人陸氏可特贈咸寧

郡夫人杜氏可特贈高平郡夫人

朕廣錫類之義褒輔臣之先貴以寵章周于三世具官某故曾祖母某氏竊寵之質婦德是宜孰嗇其年不逮偕老流慶云遠施及曾孫是生哲人為我丞弼爰頒茂渥疏以郡封庶幾遺芳可詔來者

杜氏下改作嬪良士著德閨門蘋藻之恭終老不懈

故祖任朝奉大夫贈正奉大夫闕

可特贈太子少傅

惟周大雅推美文王得人之休至于不顯亦世

蓋言世家之盛其所自來遠也具官某故祖某  
發身科目學行著聞屬時故人威勢熏灼而耻  
于附麗仕止監州家法之傳至孫而大屏去權  
倖從容廟堂乃考彝章命以儲傳英魂未泯服  
此寵靈

故祖母碩人沈氏可特贈齊安郡  
夫人

朕登用良弼惟時名儒詩書起家實自其祖亦  
惟良配克相助之可無追崇以光閭壺具官某

故祖母某氏柔順之德始終不瑕愛篤于孫口授章句積慶既遠收報彌長非必其身親見之也封之大郡式慰永懷九原有知尚其來監

故父任朝奉大夫贈中奉大夫季敏可特贈太子少師

詩不云乎惟其有之是以似之凡士大夫之立身行道為世顯人者未有不由於教忠之美也故既用其子必有以褒崇其父焉具官某故父某孝友著於家庭惠愛施於州縣及見其子揚

名于朝而廉介不阿共厲風節抱志未究士論  
惜之朕方作新治功豈用爾子一經之訓久而  
彌光秩以宮師顯于無斁

故母碩人章氏可特贈永嘉郡夫  
人

詩頌魯侯及于壽母今吾名臣致位近弼而母  
不逮養可無以慰其罔極之恩哉具官某故母  
碩人章氏嬪于德門動遵禮範勉夫以義教子  
以忠視其夫之靜退回翔曾不以介意也願有

賢子經明行脩左右朕躬顯聞天下載疏新渥  
追錫郡封其始自今不一而足

妻碩人蓋氏可持封信安郡夫人  
詩之鵲巢采蘋述夫人之德反覆詠歎若不能  
已于言內助之賢固人所樂道也具官某妻碩  
人某氏生自名門閑于禮則作配君子敬順無  
違惟予輔臣早有令聞而從容出處不失其宜  
警戒相成伊爾之助方以齊家之美達于治國  
之經受祉之多自今以始匹休偕老爾實宜之

湯沐䟽封惟禮之稱

黃疇若殿中侍御史

朕欽念永圖若稽前矩允惟言路之輕重實關  
治道之汙隆宜得端良以司風憲爾博雅好古  
直諒多聞拳拳許國之忠發為議論挺挺濟時  
之志慮及幾微獨障頽波力明大義屬予更化  
賴爾盡言其遂秉於臺綱且密陪於經幄惟邪  
正之當辨蓋治忽之攸分有虞之無遺賢尚謹  
防於讒說成周之多吉士方深戒於愼人勉體



眷知益舒抱負

余崇龜監察御史

朕興起治功廣開言路嘉與多士一新今圖肆  
求淳實之人以贊紀綱之地爾秉心無競制行  
有常夙懷挺拔之材不自表襮獨厲安恬之操  
見謂回翔久養望於郎潛甫陞華於樞屬載惟  
六察分正一臺適當綜核之時尤重糾繩之任  
環觀在列允屬斯賢惟有德之言能閉邪而陳  
善惟仁者之勇不吐剛而茹柔尚悉乃衷以承

朕志

宇文紹節授太中大夫

十乘啟行夙重宣威之任三載考績載疏增秩之恩騰我近臣對于明命具官某材全文武學貫古今補過拾遺已三登於法從折衝禦侮方獨寄於行臺惟望實之素孚宜威聲之大振屬茲會課爰俾序陞計累日之勞蓋姑循於常法據濟時之業尚有待於殊勲式佇遄歸嗣頒褒渥

何異授中大夫

聯禁路之華緬懷舊德會吏銓之課載舉彝章  
爰錫明綸以昭茂渥具官某風姿凝遠操尚清  
脩簡在六卿夙著論思之益寄之兩路咸推鎮  
撫之規雖自適於燕閒顧不忘於注想眷言雅  
望序進文階累日積勞豈近臣之所計三載考  
績以有國之當先其體素知尚思忠告

楊石觀察使知閣

朕資中宮之助篤外家之恩褒其手足之親俾

視公台之貴施及子姓並畀寵章匪予所私惟  
義之稱具官某稟資通敏莅事恪勤出入禁廷  
夙有常度周旋上閤克謹多儀肆茲疏恩度越  
常比廉車之重舉以畀之蓋施之厚者其望之  
固深也昔漢明德后躬履儉約深戒滿盈至于  
內外從化惟我賢后異世同符爾惟欽哉以成  
斯美

楊谷觀察使

朕歷觀前代之隆替率以戚里為重輕惟我

祖宗世有賢后風化之盛超于漢唐肆時中  
宮克踵前美載稽彝典褒及外家具官某賦質  
和平持身恭愿服在賓閣習于禮文閱時滋多  
宣勤靡懈避遠權勢退然下人朕心所知朝論  
惟穆茲由遙郡峻陟廉車而又父子聯榮弟兄  
並命朕之施於爾者不其厚乎富貴不驕古之  
至戒益堅素履毋替初心

趙善宣知臨安府

漢京兆之選並于九卿史冊所稱名字相望惟

今天府率用從臣或擢自郎闈特加屬任往往不一再歲遂陟論思固漢之遺意也爾秀出公族奮于儒科承流近藩聲問日起蓋嘗驅馳萬里出入六年權牧餽餉咸稱其任亦足以見爾材矣比由家食召置工曹閱日未幾寄以彈壓爾其審先後之序酌寬嚴之宜使都邑肅清甸畿蒙惠朕之褒爾豈特內閣之寓直哉徃究爾材以須大用

張榮贈遙郡團練使

自邊陲有事以來熊羆之士或身先戎行以死  
報國朕惻然愍之爾提兵夔門來援鄰境力戰  
禦敵不為苟生橫階之崇遙團之重朕豈於汝  
吝哉九原有知服此殊渥

婁機守吏部侍郎

朕式叙人倫肇崇國本師友之得英俊夙資諭  
教之忠老成之有典刑更賴切磋磋之美特頒茂  
渥以起舊人具官某識造高明量涵寬裕博物  
洽聞之學孰與齊驅懷道守義之心獨安平進

民庸浸著物望彌孚自約史於石渠實授經於  
資善箴規匪懈裨益居多逮此建儲方嚴擇屬  
雖退休之自適顧簡注之不忘爰擢冠於貳卿  
俾兼於顯職二疏勇去昔想聞祖道之光四皓  
來歸今復見衣冠之偉其祇隆眷勉續前功

趙希懌江西提刑

朕遵累朝之典擇公族之良歷試外庸以隆  
屏翰其治行尤異者必褒而進之爾德度寬洪  
操尚端雅譽處之美搢紳所推選畀郡符千里



蒙惠擢將使指列城鄉方乃疏延閣之榮就陟  
詳刑之寄封部惟舊光華一新勉布寬典以需  
嗣渥

鄒應龍中書舍人兼太子右諭德

朕惟天禧治平之盛有若晏殊韓維之賢皆  
以西掖之臣兼領東宮之屬選掄至重眷遇加  
隆今得名儒可追盛事具官某清姿絕俗敏識  
造微冠倫魁能早顯聞於天下進德脩業獨思  
企於古人涵毓既深聲華蓋茂比在記言之地

實參資善之游啟導有方勤勞無懈顧已孚於  
物望乃自列於民庸屬建元良廣延賓友豈無  
他士孰與舊人爰擢寄於絲綸且重資於羽翼  
號令文章之可述方觀潤色之功孝仁禮義之  
素明猶待漸摩之益體予妙簡據爾深衷

范仲士知江陵府

數易之與久任其利害不待較而明也然而地  
有輕重勢有緩急擇材而任之亦安可以有拘  
乎爾通練之材剛介之節求諸右列蓋無幾人

擢帥夔門曾未數月朕豈不重於遷易哉亦惟  
荊州襟帶江湖控引襄蜀於今地勢所繫匪輕  
急於得人肆以命爾順流東下可張吾軍撫綏  
一方以紓北顧益推素志式慰殊知

劉甲授寶謨閣直學士

朕惟西州多故之後公私交病念之靡忘亦惟  
二三從臣分任蕃宣之寄達朕德意以安其民  
績用旣彰褒崇可後具官某材望推于當世風  
流本于故家服在禁塗有言可采付之外闕厥

聲達聞惟古漢中為今邊要徒得卿重以寬顧  
憂再歲于茲列城寧晏非朕所望於從臣者乎  
學士之聯蓋不輕畀勉迄爾効式遄其歸

馮從順授四字夫人

朕率循彝憲並建婦官凡分任於掖廷皆簡求  
於懿質服勞既久疏渥為宜某氏性稟和平心  
存恭順守箴圖之戒律已有常謹命令之司克  
勤無怠爰即啟封之舊載加美號之新祇服寵  
光母渝職守

楊從慧授二字夫人

禁省之嚴莫先謹密婦官之長必擇溫良載考  
賢勞誕敷褒渥某氏稟姿婉孌履行柔嘉服在  
宮闈小心匪懈典我命令率職無違爰寵畀於  
美名俾兼司於列御其祗朕命毋替爾常

衛從正授國夫人

司命令之嚴有嘉率職涖宮闈之重可後疏榮  
某氏婉淑之資謙和之美服在禁省見謂小心  
歷歲月以滋多積勤勞而靡懈茲隆事任肇造

國封其欽對於恩徽尚勉循於職守

何寅寅授郡夫人名從謹

婦官之職內治攸資雖曰序陞蓋由能選某氏  
夙稟淑質克謹令儀役于宮闈實司筆札服勞  
滋久率職無渝爰肇啟於郡封俾晉司於禁省  
往祇寵渥益懋忠勤

陳咸授朝請大夫

臨大節而不奪古之君子以為難矣武興之變  
朕蜀士得數人焉可不深褒而亟進之手爾

攬轡觀風有澄清之志適罹迫脅義不受汙棄  
官潔身以死自誓凜然全節對于古人朕既擢  
爾為郎付以重寄又增秩以寵嘉之益摠爾忠  
以需召用

卒棄疾待制致仕

下賜環之詔正切須材慕垂車之榮遽聞謝事  
勉從忱恂載錫寵章具官某蘊識疏明臨機果  
毅功名自許早已負於奇材險阻備嘗晚益堅  
於壯志事我烈祖逮于冲人疇其外庸登之

法從顧歸休之未久曾春注之不忘念孰贊於  
邊籌俾入承於密旨胡然抱病亟此乞身即次  
對之舊班疏文階之新渥以崇體貌以賁丘園  
無競維人方緬懷於故老勿藥有喜尚永介於  
祺

趙希懌江西運判

部使者皆所以察吏治諏民瘼也漕輓之司其  
責尤重非考諸已試胡可以輕畀乎爾宗姓之  
英儒雅醞藉司庾江右仁聲日聞朕方疇爾庸



畀以平反之寄而將漕虐任獨難其人愈曰汝  
宜豈嫌改命惟一路之臧否休戚爾所素知事  
任既崇風采增煥益推爾志以契朕懷

余崇龜授朝大夫

朕念介弟方有志于學遴選良士俾與之游朝  
夕切磋底于日益書勞疏渥厥有舊章爾問學  
淵源見聞該洽天人性命之理講之熟矣從容  
指授開益為多及此終篇可忘懋賞朕方寄爾  
風憲期以經術見於有言其體眷知益據所蘊

劉桀授朝奉大夫

朕篤友介弟遴選良士以與之游講切之勞可  
忘懋賞爾學行兼美士論所推從容授經多所  
裨益肆稽故實序進文階體我眷懷勉輸忱報

趙師異知鎮江府

自邊陲有事朕於沿江諸鎮未嘗不重其選也  
矧惟京口內蔽行都外控淮甸重兵所宿流徙  
所歸非位望之崇孰與領此具官某宗盟之秀  
擢自阜陵夙著外庸遂登顯用三尹京邑再

列文昌方事之殷惟材是任顧如卿者而可久  
於家食乎起之北門以護江面挫折衝禦侮之  
略審勞來安集之宜勉旣乃誠以符眷倚

李洪淮西總領

中興以來始以朝臣外司兵食其權任視他司  
不侔矣况方邊戎未解之際乎爾知憲疏明材  
猷強敏周旋中外茂著勤勞比由列卿將漕淮  
右亦既習知利害見于已行矣餉事之重命以  
起家疇其積庸俾貳外府轉輸之方急當酌其

宜獎蠹之既除當杜其漸往宣美効逆有褒書

衛涇封贈三代及妻

故曾祖贈太子少保孝先可贈太子太保

士以儒術立家雖其身不過而傳之數葉彌久  
彌昌者亦可以見其人矣朕考大臣之世蓋於  
是有取焉具官某故曾祖某篤于詩書潛德不  
曜而決科有子世美有孫遂生哲人登于近弼  
報本反始於禮有稽官保之崇命以序進尚時

幽窆服此寵榮

故曾祖母咸寧郡夫人陸氏可贈  
文安郡夫人

朕登用輔臣褒及先世推其積善本於閭門並  
錫寵章以慰追遠具官某故曾祖母某氏作配  
君子躬履勤勞而降年不遐遺憾窀穸天命弗  
僭是生曾孫為時聞人弼我幾務曾未踰月再  
錫郡封尚綏爾神益饗其報

故曾祖母高平郡夫人杜氏可贈

漸春郡夫人

朕登用輔臣褒及先世推其積善本於閨門並  
錫寵章以慰追遠具官某故曾祖母某氏夙以  
懿行來嬪德門克相其夫敬戒無怠厥有良子  
以儒起家施及曾孫間于兩社曾未踰月再錫  
郡封尚綏爾神益饗其報

故祖任朝奉大夫贈太子少傅闡  
可贈太子太傅

士大夫之以詩書遺其子孫者不為少矣而行

義傳家蓋罕見焉惟我大臣發祥自祖稽其行  
事宜有寵褒具官某故祖某明經決科積勞州  
縣而耻於苟進守志不阿傳之闕孫世有清節  
家道之所由盛豈偶然哉踰月于茲錫之再命  
庶幾百世追誦遺芳

故祖母齊安郡夫人沈氏可贈汲  
郡夫人

婦人之美至於能勉其夫淑其子者蓋已難矣  
若夫康寧壽考復推所以教子者而訓于孫則

其積益深其報斯遠具官某故祖母某氏窈窕  
之質閑于婦儀柔靜自將不出閨壺而若夫若  
子行義脩明顯于閭閻遜濟政地非積深而報  
遠者乎既啟郡封申以再命九原未泯尚其監  
斯

故父任朝奉大夫贈太子少師李  
敏可贈太子太師

朕擢用大臣崇其禰廟所以隆禮而廣恩也况  
於有勞可錄有德可稱者手具官某故父具官



某陳力州縣惠及于民積階為郎其資歷已深  
矣而獨安平進不撓于時父唱子從惟義之守  
雖天畱其壽有蘊未伸而彌爾子之賢者未有  
不推其所自也宮師之秩再命彌尊其始自今  
享于世世

故母永嘉郡夫人章氏可贈通義  
郡夫人

母子之愛無所終窮朕推恩輔臣必原其念母  
之心考諸經誼以隆贈典具官某故母某氏柔

德懿行稱于閨門順承其夫不忘警戒曾未華  
髮有子顯名而訓飭丁寧不使其苟于進也萬  
鐘之養百兩之將令惟其時而顧弗及見子之  
思報其亦何有已乎啟封未幾進手大郡惟禮  
之稱以慰永懷

妻信安郡夫人蓋氏可封和政郡  
夫人

召南之大夫勞於王氏而勸之以義者乃其室  
家也矧吾輔臣懷忠厲節左右躬朕是豈非內

助之所致歟具官某妻某氏嬪于德門夙謹婦  
道蘋藻之薦敬以不渝琴瑟之和久而無斁克  
相君子為時名儒夙夜相成之功固非召南室  
家可同日語也冠于命婦再啟郡封服我茂思  
益充爾美

譙令憲宗正少卿

由漢以來任司宗者皆同姓也至于我朝別  
置大宗正司而卿貳始專用儒臣設官之義視  
前代加重矣爾迪德和平臨事詳緩上流奏最

召寘郎闡三轉為卿隱然譽處敬刑折獄克既  
厥心朕方審閱人材不嫌歷試爰茲改命晉列  
清華不惟推親睦之恩成信厚之美而一代文  
典實與討論往對簡知益涵器業

宇文紹彭大理少卿

張釋之為廷尉持平守法下無冤民考其論議  
乃貴長者而惡利口亦可以知其為人矣爾回  
翔州縣克繼家聲選自使軺來踐近列靖共爾  
位不褻其華容止退然其言如不出諸口非釋

之所謂長者乎陟之九卿付以臬事片言折獄  
毅然不可奪者朕所以望爾也尚其勉之

王遹贈通奉大夫

朕博選老成延登侍從資其忠力共濟治功至  
於謝事之餘驚聞遺奏則必優以贈典賁于九  
原具官某業自家傳材為世用久勞州縣茂著  
民庸晚遷班行遂司邦計典刑有在意氣未衰  
比報政於潛藩甫䟽榮於次對勉從歸志尚企  
嘉猷胡不憇遺為之永歎錫以四階之寵登于

三品之崇尚克有知以綏爾後

曾梟降朝請郎

中興以來邦賦之入于四總司者居大半焉受其任者可不謹乎爾夙以能稱將命淮右而妄費無度達于朕聞奪爾三階是為中典尚圖後効以蓋前非

李謙授武略大夫

朕選信實之臣典宮城之事比其歲滿必遷秩以寵之爾昔服厥官有勞未錄朕方擢之環列

詳試爾能乃即舊章載疏新渥勉殫忠力毋負  
眷知

范仲士授武德郎

忠節之臣國家所賴以為重武興之變朕於蜀  
士僅得數人焉可不謂之難乎爾夙負壯心適  
羅迫脅志在徇國義不顧身蓋庶幾臨大節而  
不奪者朕方畀爾連帥之寄又增秩以寵嘉之  
益摠爾忠以稱知遇

陳煥授武節郎

朕博選右列之才置諸賓閣詳試于外期以事  
功序進一階厥惟常典爾游更器使夙有能聲  
剖符邊城責任方重徃祇朕命勉圖爾庸

盧濤父母初封

壽考安榮人子之所願於其親也爾夫婦偕及  
九齡逮于祿養屬予宗祀推老老之恩並服  
寵光益綏遐祉

陳湊授保義郎

朕比命督府申遣行人爾服役其間不辭游徃



進階二等亦何吝焉

顧根降宣義郎

朕深軫民瘼謹核官邪凡逞欲以遺害者未嘗少貸也爾貳事帥藩宜宣德意而冒于貨賄以玷臺評削秩罷歸尚思懲艾

孟猷降朝散郎

朕博求人材詳試以事進退賞罰各適其宜爾儒雅好脩藹然譽處比由推擇將漕淮陝方事之殷餽餉無乏朕方嘉爾宣力召寘周行乃惟

行臺適有論奏肆俾鐫秩以示至公尚體朕懷  
勉輸忠報

李春等授官

汝選在虎賁闕歲彌久超畀勇爵徃即戎官益  
宣爾勞以報恩寵

陳澤等轉官

爾効職邊城不輕于去充是志也豈不足以立  
功乎旌以兩階庶幾知勸

鞏斌授脩武郎

爾勇略過人明於逆順手誅逆黨以伸國威寵  
升六階升其事任益殫忠力嗣有恩榮

育德堂外制卷第三